

2 Timoti

1 ¹⁻²I dere aŕeta, Kótóné ama tuęre ala sya furaalu, dotonale *apospel* whi Pol-né dapó. Yało hosaa mole naale Timoti ya paae Aya Kótóro Tale Yesu Kerisotamo tuąmó kaaróló wou betere kolené sukuturaalu hałe tao sere alakélé, hosaa muni deyóló mo dua betere alakélé, ya tuąmó muó tanópoló yae.

Talené fo aąmó sukóló bitu erótu betae ere fo

³Yało ayarape deale whirape me dowi ala ini, tuę wisi muluraalu, Kótóné ama ala eraté wale kaae, mió yałokélé Yesu Keriso tuąmó mo ti betere bete mulapóló kisipa mutu, ę ama kutó i dirótu betere ape.

Tétu deątamokélé, dikitamokélé, ya kisipa keteréni, momatóró yó taruraalu, Talepaae mo kée dapó. ⁴Naaos kelemó dorowou betere wole kaapemó kisipa mutu, ę haįné sukaįai ya kęle wolée i du betere ape. ⁵Yało tuę mutupa naao tuę tiki tiratere alata, tó mó ini, folosóro naao ausere Lois-ró naao hae Yunis-tamo tuąmó iru yale kaae, mió ya tuąmókélé mo atérapóló kisipa mutapó. ⁶Atérapa, naao tikimó yało naase mulale sukamó Kótóné yaąpaae melale ala mo hałe muaąsórópa, si mi holópoló fiłitu dere kaae, mo doa ketekeę buóló erótu betaasepóló, ma fo i dapa wosae. ⁷Ti noatepae, Kótóné da melale kepe beteta, wiratere kepe ménitei, da mo halaaiyóló, yaala sókó fole ala yóo, da tuąmó kae kae mole kisipa tiki haşókó fóló dowi ala yaąsóró, mo wisiyóló teąteróló kaae tawóo yópoló, fotokę bole kepe wisi melalepó.

⁸Térapa, so whi feané keletómó da teąteróló kaae tare Talené ala etéropóló yó móturaalu, halaainé erótu betae. Ama ala erótu betepa, *dipula* bemó betero betere whi ę kilitukélé hale yaąse. Tėni, kale mió i wosetu betere fo wisi yó mótu betepa, ę su betere sekę kaae mené yaąpaaekélé eratepa, belée tawae. Ti ai sere sekęta, Kótóné daąmopaae mótu betere fotokę tuąmó betepa, ti suąmó belenérápó. ⁹Ti ai sekėné amatei da aluyaąsóró tao sóro ama kae betero betere so whi betero poló ę beterepaae ape yałeteita, ti dané me wisi ala dere kolóló initei, Kótóné ama mo eraalopó yóló muló betere ala sya furaalu, hałe hamokoróló tao salepó. Da atéro Yesu Keriso tuąmó betepa melale hałe hamokoróló

tao sere alata, i haeró s̄atamo aleyaaipatei meló beteraþó. ¹⁰Ai alata, ða tao sere wh̄i Yesu Keriso wale sukamó h̄akeamó eratepa, so wh̄i feané kelaleþó. Ti ai sek̄enéta, sukutere ala ama sóró mo ti aluróo, mo ti betó tawaaire ala ðe tuamó mupa so wh̄iné kolóo yóþóló, mió i wosetere kisi fo wisi yó mótu betereiné h̄akearaleþó. ¹¹Mió i wosetu betere kisi fo wisi kae kae be huluamó betó mole so wh̄iné wosóþóló Kótóné fo i ape yóló yó melóo, bete mole fokélé yó melóo yóþóló, amatei e dot̄eyaairaalú sóró beteraþé. ¹²Atétu betere alamó e sek̄e su betepatei, wiyóló haletere alakélé dumipó. Ti noatepae, e tūe tiki tiróló betere sek̄éta, yaþo mo diriyóló tūerapó. Atéru, mo hotowayóló kaae tawae yale ala mió i betere alimókélé amatei kaae taté fóló, take kemene fole sukamókélé ama mo s̄umó kaae tanérapóló kisipa mutapó.

¹³Yaþo yó matepa wosale fo mo diriyóló tūe mulu, naao yó mótukélé ai fo kaaetóróti yó mótu betae. Atéró yó móturaalu, Yesu Keriso tuamó bitu, kisipa tiki tiratere alakélé, yaala sókó fole alakélé, yó tawae. ¹⁴Mené yaþaae wisiyóló kaae tawae yóló melale ɔla wisi me ala yaosóró ða tuamó betere Ðei Kepe Wisiné ya fotok̄oratepa, mo hotowayóló kaae tawae.

¹⁵Esia hae kwiamó betó mole wh̄irape feané e taaróló fupa, Fikelus-ró Hermosenes-tamokélé e taaróló feletei naao ai tūere ape.

¹⁶Onesiporus-ró ama be wh̄itamopaae Talené k̄olené sukóló tao sere ala eróþóló yae. Ti noatepae, e *sein* k̄epiné dokóló *dipula* bemó betepa kilitu, atima wiyóló hale ini, wisi ala eraté fu betepa, e kisipa feléyóló betaleþó. ¹⁷A Rom be huluapaae wóló, e momó betereróþóló kelaai kikitu wikélé ó h̄ókélé ini, mo ketek̄e buóló keketé kutu betero nalo e kelaleþó. ¹⁸Take Tale waaire be ðemó ama k̄olené sukóló tao saaire ala wisinaale aþaae eróþóló yae. Ðamo Epesus bemó betepa, ama e tao suraalú, kae kae ala eraletei naao ai tūere ape.

2 ¹⁻²Térapa, Yaþo naale-ó, Yesu Kerisoné h̄ale hamokoróló tao sere ala tuamó fotok̄ buóló betae. Atéró bitu, so wh̄i feané keletómó yaþo yó mótu betepa wosale fo naao mepaae mo wisi ala yó tare wh̄irapepaae i kale fo wisi mo wisiyóló kaae tawae yóló sóró beterae. Ti ai wh̄irapeta, h̄ale wh̄irape meitei, mo so wh̄ipaae Kótóné fo yó melaai mo s̄ure wh̄irapetóro sóró beterae. ³Ðata, Yesu Kerisoné sóró betero betere diki tare wh̄i wisirape s̄u betepa, sek̄e ala wapakélé me ɔla meipa, ðamo betamó titiyóló bitu, h̄ale belée tawae. I haemó betó mole diki tare wh̄irapené dere ala tūe muae. ⁴Atima t̄eteróló kaae tare wh̄iné kisipa tiki feléraaire alatóro yó taru, mo so wh̄iné kae kae du betere alatamo hosekéyóló dumipó. ⁵Atétu dere kaae, mepaae wh̄irape sururu yóló furaalu, i yae yóló muló betere fo wisiyóló sya fenitepata, ti kale folosóro fole wh̄irapené derótua dere topo tao saalomeipó. ⁶Kutó dituraalu, depe tukó wei ala du betere wh̄inéta, folosóro ɔlumé dere ɔla amapi senérapó. ⁷Yaþo i dere fo bete wosóló, noa fo betené déróþóló kisipa tekeyae. Atéteþata, ti ai forapené bete Talené yaþaae yó melaalopó.

⁸ Yaŋlo i yó mótu betere kisi fo wisita, kale Depit-né deté wale whi Yesu Keriso sukóló momó kepaayóló beterapóló du betere fo mo diriyóló wosóló, kiswa muae. ⁹ Ai fo erótu beteremó, e mo dowi ala yale whi kaae *sein* képiné dokóló *dipula* bitu, mo seke su beterapó. Téretei Kótóné fota *sein* képiné dokóló munipó. ¹⁰ Atérapa, Kótóné sorokó su yóló kae beteró betere so whirapeta, Yesu Kerisoné tao sóró mo ti betó tawaaire de tuámó beterópóló kiswa mutu, e kae kae sekei ala sótóró tarapó.

¹¹ I dere fota, mopóló kiswa tiraaire fopa wosae.

Da ątamo sukutepa, ti da momó kepaayóló ątamo betámó betaalopó.

¹² Mió i betere alimó ąpaae sekei ala wapakélé, hepée taae faróló fupa, ti take nalo waaire alimókélé, fea ala fea ama kaae tare kaae, ąkélé ątamo betámó bitu, teteróló kaae tawaalopó.

Đanétamo ą tuęnipó depa, ti amakélé ąpaae ąkélé ą tuęnipó fo yaalo ai ape.

¹³ Đanétamo ama ala erótu beteretei hýyóló taalatepa, ti ama ąnę dere kaae yaalomeitei, ama yó tare ala haęe yótóró tawaalopó.

Ti noatepae, ama ere ala amatei doróló me kae ala enénipó. Ama du betere ala wisitóró haęe yó tarapó.

Kótóné ama kutó diratere whi wisipó yópóló kutó wisiyóló dirae ere fo

¹⁴ Kótóné fo wisi erótu betere so whirapené kiswa keteraąsóró yó maté fu betae. Tétu, haęe mo sawa fomótei doasi bete mole fo nisiyóló alale sóró u só derótu i só derótu yaąsóró, Kótóné keletómó mo dirii ma fo du betae. Ti noatepae, atei bete munire fo wosetere whirapené kiswa tiki dorótu beterapó. ¹⁵ Naa Kótóné kutó ditu beteretei, hoko dirateremó haleyaąsóró, mo bete mole fo wisi donotóró yó mótu betae. Atétepa, Kótóné naao ai ditu betere kutó wisiyóló kaae kolóló mo whi wisipóló dukiratere fo yópóló, mo doa ketekę buóló erótu betae. ¹⁶ Kótó sisópaae eróló, haęe hoko forape wosaaitapóló faąse. Ti noatepa meipó. Atei fo du betere so whita Kótó kiswa keteróló sisópaae mulóló mo ti aluraté faalo ai ape. ¹⁷ Ai whirapené yó matere fota, dowi humu fakeyóló kęlaate furaalu, whiné tiki turó dorótu dere kaae, so whi feané kiswa tiki mo ti doraalo ai ape. ¹⁸ Ai fo yó mótu betere whirapekó Haimeniasisró Piletus-tamo kale mo fo wisi taaróló ai fele ape. Ti atimaamoné etei fo du beterapó. Da Keriso so whita, take kepaayóló beteretei, momómo kae kepaayaalomeipó du beterapó. Atétere foné mepaae so whiné tuę tiki tiró betere ala mo dorótu beterapó. ¹⁹ Tétepatei, Kótóné mo ti muó tawaaire bete tukóló muló betere kapo fake tómótei i fo aseyóló muló beterapó.

“Talené ama naale senaaleta, ti amatóró tuęrapó.”

Fo me i ape.

“Talené ama ala erótu betere so whi feata, ti ama so whipa, dowi ala mo taaróló kae betae.”

20-21 Betā néli whĭné ama doakale tēne be dolomó, *kold kaparó silpa kapatamoné* aleale wisi wisi ɔla muóo, mepaae mo ni fakeró haetamoné aleale ɔla ɔlakélé muóo, erapó. Atére ɔla ɔla mepaae mo wisi kutó maaté diyaaairaaalu bukóló kae mulóo, mepaae ɔla ɔla, ti haĭe hōko kutó diyaa saaitapóló kae mulóo, dua dapó. Mepaae whĭ dené haĭe bete munire ala sisópaae mulóló, me alakélé munipa, ti mepaae kae kae wisi ala ai whĭné sūmó eranérapóló kisipa mutu, Talené taleyóló kae beteró beteratapó.

22 Teó so whĭné ekęle yóló du betere dowi ala yapaaekélé eraşósó, mo hotowayóló kaae tawae. Atéró, Kótóné so whĭ atima hosaa tuąmó mo wisi kisipa betā mulu, Talepaae momatu betere so whĭtamo yaĭkélé betāmó bitu, mo donoi alamaaté yó tawóo, tuę tiki tiratere alakélé yóo, yaala sókó fóló hosaa muni deyóló dua betóo iru, ketekę buóló eraté fu betae.

23 Topo doyóló okokoi kisipa mole whĭrapené u só derótu i só derótu dere kaae momókó yaşe. Ti noatepae, atétere alané hęle sere ala kaarótu betteretei naao ai tuęre ape. 24 Ti atei kaae ala Talené kutó diratere whĭné dere ala meipa, mo yaşe. Tēni, so whĭ featamo mo dua naameyóló bitu, Kótóné fo wisi betā yó melatere fosó fosóre whĭ betae. Menétamo yapaae dowi ala eratepa, apaae kwia tokó melaai kisipa muni, mo donoi ala betā erótu betae. 25 Kótóné kutó diratere whĭrapetamo bóe du betere whĭrapepaae Kótóné fo wisi mo dua naameyóló yó mótu betae. Ti ai bóe du betere alata, haĭe meipó. Satan-né ama kisipa mole ala erǒpóló, atima ama hemó ai daló betere ape. Atérapa, ai yó matere fo wisi woseté furaalu, Kótóné atima kisipa tiki feterǒpóló dua yó mótu betae. 26 Atéró feteratepa, mo foné bete diriyóló tuęturaalu momómo kisipa wisi muóló, Satan-né hemó doló mualetei sokóló haĭe fǒpóló eraalopó.

Kemetera be demó Kótó hǒróló bóe daaitere ala

3 1-5 I dere fo mo diriyóló wosae. Kemeyaaitere alimó mo dowi seĭei ala wapa so whĭ feané i alarape du betaalo ai ape. Atimatei atima yaala sókó fole ala yóo, *monimó* ekęle dere ala yóo, bopé fake dere ala yóo, amatei aĭ hale horatere ala yóo, dowi teka fo yóo, atimané hae aya aĭmó sukóló bitini yóo, mené wisi ala eratepatei mo kée dere fo ini yóo, Kótóné ama kae beteró betere so whĭ bitini yóo, mepaae so whĭpaae yaala sókó fole ala ini yóo, me whĭtamo hęle saletei hapale kemeraaire tuę muni, dowaae fole ala yóo, eratere fo yóo, atimané ekęlere ala tęteréni yóo, kęle dere alakélé ini, susupuratere alamaaté eróo, me whĭpaae wisi ala eraai tuę muni yóo, mo no apu nisirutei eleké deyóló dóo, yaaitere ala kisipa tekeyóló ini hōko yóo, mené kolóló dukirǒpóló nene dere ala yóo, tó tikiné yaaitere ala ekęle yóló duraalu, Kótópaae yaala sókó fole ala ini yóo, atima Kótóné ala eratere whĭrape aĭrutei ai ala eraaire fotokó meitepa, atimanétei hǒyóló taaralepó. Atei ala du betere so whĭtamo fulumu yóló bitini tika kae betae.

⁶Ai ala du betere wh̄irapené wisi ala yaai tuę munire sorapené bepaee kikiti dua sókó fóló kale sorapené kisipa tiki doróló i ala yae yóló yó mótu beterapó. Ti ai sorape atima du betere dowi alané atima só deróló atimané kisipa tikikélé beséne ni upaae só fua ipaae só wua dere kaae, kae kae dowi ala yaai ekęle yóló du beterapó. ⁷Atimané kale fo wisi saalopóló su betepatei mo foné bete wisiyóló kisipa mutumipó. ⁸Take Moses-né Kótóné fo i ape yóló yó mótu betepatei, Janes-ró Jamperes-tamoné ai fotamo bóe du bitu yale kaae, ai wh̄irapénékélé mo fotamo bóe du bitu, dowi ala yaaire kisipatóró f̄anuraalu, Talepaae tuę tiki tiró betaaire ala sunipa, Kótóné atima taaralepó. ⁹Kale u wh̄i tamopaae yale kaae, ai wh̄irapené h̄oko ala du betere bete so wh̄i feané kolǒpóló h̄akearatepa ęlo sukamó deté fu betaalomeipó.

Pol-né Timotipaae i ala yae yóló ketekę bulale fo

¹⁰⁻¹¹Téplatei, ęlo yó mótu betere fokélé, ę betere alakélé, ęlo yaai tuę mutere alakélé, kisipa tiki tiró betere alakélé, sekę beleté fu betere alakélé, yaala sókó fole alakélé, sekęi ala wapatei hepée taae faróló h̄ale yó tare alakélé, susupui ala erótu betepakélé, kae kae su betere sekęi alakélé, ę Antiok beró Ikoniam betamomó betepakélé, Lистра bemó betepakélé, ępaae kae kae susupui ala erótu betaletei, fea naao ai tuęre ape. Ai alarapené ę só deraşóró Talené ę tao salepó. ¹²I fota mo dapó. Mepaae wh̄i detamo Yesu Keriso tuamó bitu, Kótóné ala eraai kisipa muóló erótu betepatei mo wh̄irapené atimapaae sekęi ala erótu betaalopó. ¹³Ai ala erótu betere wh̄iraperó mepaae wisi ala du betere nisi dere wh̄irapetamo atimatei dilikitu yale kaae, atimané mo so wh̄ikélé dilikitu beterapó. Atimané atéró du betere dowi ala mo ti faketuraalu, atima mo doraalopó. ¹⁴⁻¹⁵Atimata ai ala du betepatei, ęta kaepa, ępaae ai fo yó melale so wh̄irape naao tuęru atimané yó melale fo tuętóró yó tawae. Kótóné mo ama kae aseýóló muló betere fota, ę mo ketemó bitu woseté waletai naao mo tuęrapó. Ti ę Yesu Kerisopaae kisipa tiki tiraté fu betereteiné aluyaşóró ai fonétei mo tao saaire bete wisiyóló tuę yǒpóló, yó melanérapó. ¹⁶Kótóné aseşmó yóló muló betere fo feata, ama bole fomo sókó faraletiné eró beterapó. Ti aita noa ala yǒpóló meipó. Kótóné ala eratere wh̄iné kae kae wisi ala erótu beterǒpóló kisipa mutu, yóló muló beterapó. ¹⁷Tétu, ai fonétei mo so wh̄ipaae yó matere ala yóo, dowi ala depa foné sere ala yóo, me h̄oko ala depa donorate ala yóo, Kótóné ama donoi alamaaté mo şumó wisiyóló eraté fóo enérapó.

4 ¹Kótóné kele tómókélé, da betere so wh̄iró sukale so wh̄itamo fo tokótamo yóló tale yaaire wh̄i Yesu Kerisoné kele tómókélé, ę waaire be dęró ama teteróló betere alatomomó tuę muturaalu, ęlo ępaae i ala yae yóló dirii fo i dere ape. Kale fo wisinaaleta so wh̄i feané wosǒpóló i ape yóló yó mótu betae. ²Ai fo yó melaai tukóló muló betere be demókélé, ó

mo hãle be demókélé, naao yó melaaire fo ali ali yaqsóro taleyóló kisipa muóló betae. Atétu, mepaae whjrapené hãsóko fupa donoratero alakélé yóo, me dowi ala depa taalae yóló, foné sóro ketekę bulatere fotei yóo du betae. Atéro yó matere fo wisiyóló sya fenitepa, foné sóro hapale só deréni, dua kaae taté fu bitu, kale bete mole fo betã mo hotowayóló yó mótu betae. ³Ti noatepae, mepaae whjné kale mo bete mole fo wisi yó mótu betepatei, so whjné wosetere hõraaire ali waalo ai ape. Ai fo wisi wosetere hõrólo, atimané yaai kisipa mole ala sya furaalu, diãné yó mótu betere fo wosaalo hõrólo atima woşliné ekęle yóló wosetu betere fo wosaaitapóló, atei kaae fo yó matere whjrapepaae ape depa, atima fea wóló touraalopó. ⁴Ti mo bete mole fo wisi atima wosetere hõrólo sisópaae eróló, bete munire dolãa fo wosaairaaluu ekęle yaalopó. ⁵Ai alata mo du betaalotei, yãpaae kae kae ala wapa, furu furu ini, kisipa diri iruraalu halaaiyóló betae. Mepaae sekęi ala wapakélé belée taruraalu, kale mió wosetere fo wisi betã yó mótu bitu, Kótóné yãpaae erae yóló muló betere ala fea taaréni eró tawae.

⁶Ti noatepae, mo so whjné Talepaae momaturaalu, kale *wain* wej momatere kapo fake tómó sunée derótu dere kaae, yãlo betere bete mió i kemeratere ape. Ti ę i hae taaróló faaire be dę mió i sóko waaitere ape. Kale bóe dale alakélé yãlo mo wisiyóló dóo, sururu yóló fóló sóko fõpóló muló betere dãlemó sóko fõo, Yesu Kerisopaae tuę tiki tiratere alakélé hãle yó tawóo yalepó. ⁷⁻⁸Téyaleteiné mió yãlo doimó muló betere topo tao mulapó. Ti aita hãle topo tao meitei, dã feané yale alamó fo tokótamo yóló mo donotóro taletere Talené ita, mo donoi ala du betere whj i ape yóló melaaire topo taopó. Ti aita, yãlomaaté saalomeitei, Tale waaire be dę sóko wõpóló kaae taté fu betale so whj feané saalopó.

Pol-né Timotipaae hapale ape yale fo

⁹⁻¹²Fo me i ape. Yã ę beterepaae hapale waasepólópó. Ti noatepae, Demas ą i haemó du betere alamó hosaa muturaalu, ę taaróló Tesalonaika bepaae ai fele ape. Tétu, Kresens-kélé Kalesia bepaae fõo, Taitus-kélé Dalmesia bepaae fõo depa, Luk betã ętamo i betere ape. Ti Mark ąta, ę Talené kutó diratapa tao su betere whj wisipa, yã wou ą dapesó ape. Tikikas ąta Epesus bepaae fõpóló, yãlo dotęyalepó. ¹³Tétu, yãlo bukutere kuti Troas bemó yãlo no Karpus-tamo mupa walepa, yã wou sóro ape. Yãlo bopeyóló mulale aştere sókurape sóro wou, kale hupu sekaęné aleale aştere sókurapekélé ai mulapa, taaróló wéni, mo sóro ape.

¹⁴Kapa diriné ęla ęla aletu betere whj Aleksandané doasi bóe dóló ępaae sekęi ala eralepó. Atéyale kwiata, ąpaae Talenétei tokó melaalopó. ¹⁵Ai sekęné dãné yó mótu betere fotamo doasi bóe dalepa, yãtamokélé bóe dóló me dowi ala eraqsóro mo hotowayóló kae tawae.

¹⁶Ętamo fo tokótamo yóló só deraai kaae sóro taleyale sukamó me whjné ę tao sere fo yaai ani, atima feané ę taaróló felepó. Atimané atei

ala yale kwia Talené alurópóló yae. ¹⁷Tépatei, Tale ętamo betámó daalu fotokọ sůmó bulaleteita, kale fo wisi yało mo diriyóló eratepa Juda fake mei, kae fake so whị feané wosópóló eralepó. Téteremó, atimané ę mo felekemó dóló aluraletei, Talené tao salepó. ¹⁸Mepaae whịrapené kae kae dowi ala ępaae eraşóró, Talené ę tao sóró ama ęteróló betere hepen bemó ere ala wisi tuámó beterópóló, mo wisiyóló dapesó fóló beteraalopó. Ama doi betą mo doasi doi muó taté fópóló yae. Mo kée! Téryópóló yae.

Mo kemerótu kọleó yale fo

¹⁹Prisila-ró oma Akuila-tamopaaekélé, Onesiporus-ró ama kekelé so whịtamopaaekélé kọleó yae. ²⁰Erastus Korin bemó betóo, Tropimus ą Miletus bemó heponé sukóló muóo epa taaróló walepó. ²¹Yaťa, sosóli ali waaipatei, ipaae hapale waasepóló dapó. Yupulus-nékélé, Pudens-nékélé, Linus-nékélé, Klodianékélé, mepaae Keriso norape feanékélé, yaťpaae kọleó dapó.

²²Térapa, Tale naao kepe bete tuámó bitu, ama hałe hamokoróló tao sere ala yať tuámó sųrópóló yae.